

卷

739

73



中国国家图书馆

NATIONAL LIBRARY OF CHINA

楹聯錄存一

德清俞樾



新安孫蓮叔觀旭樓聯

蓮叔有小樓可觀日出署曰觀旭余甲辰歲曾宿
其中適大風竟夕遂題此聯故人馬謙香孝廉極
賞之故至今猶未忘也

高吸紅霞最好五更看日出
薄游黃海曾來一夕聽
風聲

孫蓮叔紅葉讀書樓聯

此蓮叔讀書處也樓凡三折故其家人呼之曰曲



尺樓客至輒留宿其上

仙到應迷有簾幙幾重闌干幾曲 客來不速看落葉

滿屋奇書滿牀

新安汪村關廟聯

廟在汪村水口并祀張睢陽上有文昌閣

威名滿華夏真義士真忠臣若論千載神交合與睢陽

同俎豆 戎服讀春秋亦英雄亦儒雅試認九霄正氣

常隨奎壁煥光芒

河南汝州關廟聯

吾鄉人之高于汝者以此廟為公所丙辰年余行

部至此鄉人乞題

廟貌徧塵寰此間地接許昌請看魏國山河徒留荒草

輶車遵汝水使者家居茗雪願與故鄉父老同拜靈

旗

蘇州積功堂聯

乃掩骼埋斃之公所也司事者乞題

積累譬為山得寸則寸得尺則尺 功修無倖獲種豆

是豆種瓜是瓜

舅氏平泉姚公輓聯

公于諸甥中極賞余有天才之歎以第四女女焉

又嘗著疇經衍九疇爲八十一疇命余成其書至
今不果無以見公地下矣

宅相託空談想盛德如公後起自應能繼美 館甥承
謬愛媿疇經付我至今猶未有成書

蘇州漱碧山莊聯

潘玉泉觀察索題不知其爲誰氏之莊也

邱壑在胸中看疊石疏泉有天然畫意 園林甲吳下
願攜琴載酒作人外清游

潘玉泉觀察五十壽聯

觀察乃相國文恭公之第四子此聯丁禹生中丞

極賞之然觀察謙不敢當縣未久卽撤去

以名父子生宰相家有德業事功文章氣節 當中興
年祝無量壽是英雄儒雅富貴神仙

許信臣撫部七十壽聯

撫部善談名理能以周易及大學中庸說釋典余
戊辰年主其家旬日撫部每夕出談娓娓可聽也

前詞苑後封疆頻年養望湖山綠野優游共推老福
內儒書外釋典每夕縱談名理青鐙滋味還似兒時

吳母朱太夫人七十壽聯

太夫人乃平齋觀察之繼母其孫廣庵刺史亦成



進士宦吳中矣夫人以五月八日生余與平齋交
因進此聯爲壽

有子宦三吳喜從前治譜流傳已見桐孫能濟美 後
佛生一月願自此慈容矍鑠長將蒲酒祝延齡

馮室徐恭人輓聯

恭人乃馮少渠明府之室有賢德且善詞章工書
法其子聽濤茂才會從余游頗有聲乃母教也

爲名門大婦爲劇縣小君而疏食而布衣盡洗庸庸脂
粉氣 以官箴勗夫以家學課子是令妻是賢母長留
落落孝慈聲

李太夫人七十壽聯

太夫人生六子長君筱泉中丞方撫吾浙次公少
荃相國以大學士肅毅伯督兩湖家門之盛甲海
內己巳二月三日爲太夫人七十生日余與相國
爲甲辰鄉榜同年而又承中丞知愛延主講席故
爲二聯一致中丞一致相國也

起居八坐亦多壽亦多男先百花生日祝慈蔭長眷鳳
舞鸞歌徧浙水東西洞庭南北 文昌六星有上相有
上將以萬石家風佐熙朝景運玉昆金友比苞龍藏二
賈虎增三



花下版輿來自皖而兩浙而三吳而瀟湘洞庭數千里
曉拜慈雲鳳鳥舞鸞鳥歌頌無量壽佛 牀頭朝笏滿
有于爲宰相爲節度爲觀察轉運五百年特鍾閭氣玉
策賢金策聖作中興名臣

又

代許信臣前輩作

入鼎竊出封疆看膝前將相成行武達文通佐一代中
興大業 月初三春未半祝堂上佛仙齊壽玉牙金齒
開八旬曼衍遐齡

張仲甫先生八十壽聯

先生爲前庚午孝廉至己巳歲行年八十明年重
賦鹿鳴矣精神淵著且通內典所著書甚多而春
秋屬詞辨例六十卷尤爲鉅製亂後燬其版擬重
刻之然非容易也

萬卷擁書城精神滿腹著作等身積卅年雪案螢窗尤
於麟經有得 兩回游泮水淨土潛修名場倦踏看明
戴蒼顏鶴髮重歌鹿鳴而來

吳母朱太夫人輓聯

太夫人爲平齋觀察之母廣庵刺史之祖母生于
五月八日卒于六月九日



有造福三吳之子又有造福三吳之孫先後謳歌盈茂苑
遲滯滯一月而生再遲浴佛一月而卒去來蹤迹在靈山

李薇生太守六十壽聯

太守于九月四日生其先德曾任安徽廉訪有陰德也

借黃花九秋祝黃堂千秋菊部好翻新樂府 承高門
駟馬居高官五馬柏臺行紹舊家聲

江蘇臬署聯

同年應敏齋任江蘇廉訪以署中楹聯無佳者屬

爲更易輒擬數聯詒之亦未知其果用否也聊識於此

聽訟吾猶人縱到此平反已苦下情遲上達 舉頭天
不遠願大家猛省莫將私意入公門

右大門聯上聯乃舊句對聯余所易也

讀律卽讀書願凡事從天理講求勿以聰明矜濁見
在官如在客念平日所私心嚮往官將溫飽負初衷

右大堂聯

且住爲佳何必園林窳勝事 集思廣益豈惟風月助

清談



小坐集衣冠花徑常迎三益友
清言見滋味芸窗勝
讀十年書

右便坐聯

許仁山閣學輓聯

閣學爲余甲辰同年在翰林則爲前輩矣嗣子奉
其喪自京師歸余以此聯輓之

傷心丁卯橋邊萋萋歸來從此過
屈指甲辰榜上文章遭際似君稀

朱績臣處士五十壽聯

處士乃采孫孝廉之父有五子正月十一日其生

日也

有丹桂五株其大椿不老
先元宵四日祝明月長圓

張太夫人八十壽聯

太夫人乃友山方伯之母方伯官刑曹二十年出
守秦中遷四川廉訪使由廣東安徽方伯移姑蘇
而太夫人行年八十矣方伯與家兄同年因獻此

聯爲壽

京國奉慈輿而秦而蜀而皖粵諸邦又向三吳開壽萬
元宵張夜宴有子有孫有曾公繼起行看五代共華

堂



中国国家图书馆
NATIONAL LIBRARY OF CHINA

又

慈雲從京國而來為秦蜀皖粵諸大邦萬家生佛 愛

日至蘇臺更永與中丞廉訪兩賢母三壽作明生時丁雨

均做壽母

韓母王太夫人五十壽聯

夫人為韓君耀輝之繼室韓君以都司殉難有五

子長殿甲記名提督次殿爵記名總兵次晉昌候

補副將次殿榮縣令次慶雲直隸州牧同治九年

夫人年五十二年二月二日其生日也杜小舫觀察與

其長君善屬撰此聯為壽

膝前種五樹桂天上拜五花封北仲春馭降鵲鳴共祝

五旬壽母 報國提一旅師傳家羅一牀笏看諸子文

通武達同披一品仙衣

曾滌生侯相六十壽聯

大勇在安民運際中興出名世 小春欣遇閏天教兩

度祝延齡

丁母黃太夫人輓聯

太夫人為丁雨生中丞之母同治九年七月中丞

奉 命赴天津時太夫人已卧病中丞欲少留一

二日不許已而病甚中丞猶在津祕不使知烏乎



可謂賢矣

讀晉史慨溫嶠之絕裾若膝下牽衣堂前勸駕旦夕間
促辦行裝此事須知足千古 在聖門有曾母之齧指
乃身膺疾疾書報平安巾幗中深明大義至今傳誦滿
三吳

又

代友人作

多壽復多男有令子有賢孫有文孫之孫五代一堂同
躡踵 教忠卽教孝是嚴師是慈母是衆母之母三吳
百粵共調思

應室瘦夫人輓聯

夫人爲應敏齋同年繼室歿于江蘇臬使署

夜月冷皋橋尚有餘芬留德耀 秋風數莊圻不堪清
淚灑安仁

張友山漕帥五十壽聯

時友山新從蘇藩遷漕督十二月十日其生日也

太夫人在堂年八十矣潘季玉觀察屬余譏此聯

籌添大衍臘遇嘉平奉八秩慈親鶴髮堂前同笑語
任重漕艦恩承使節台三吳父老驪歌聲裏頌臺萊

史忠正公祠聯



其裔孫花樓大令屬題

明月梅花拜邗連高塚 疾風勁草識版蕩忠臣

王蔭齋觀察輓聯

觀察名曾懋故字蔭齋與余名字皆相合前年在
滬濱曾與同坐威林密輪船至金陵觀察之歿也
擬書此聯輓之數字推敲未定竟不果書補錄於
此

舊夢怕重提海上同舟兩夜聯牀還似昨 微名慙個

合吳中懷刺一時驚坐更無人

張母孟太夫人八十有四壽聯

太夫人爲子青中丞之母同治十年年八十四正
月十八日其生日也中丞以丁未第一人懸任封
圻時新從漕督調蘇撫太夫人猶在淮上也余與
中丞同年因獻此聯

溯八豨來四番春信青衣鼓瑟祝高堂百年看膝前虎
武龍文從狀頭至宰相 算元宵後三夜月明金錢買
鏡慶中興十載聽竟內鸞歌鳳舞自淮北到江南
應母朱太夫人七十有八壽聯

太夫人爲敏齋廉訪同年之母二月十七其生日
也敏齋尚未得子時有抱子之望太夫人望之甚



切矣

距花朝五日開萱壽八旬吳下剛翻新菊部 酌春酒
三杯披仙衣一品懷中行抱小蘭孫

唐母沈太淑人輓聯

太淑人乃鷓安明府之繼母卒年五十八

有命子宦三吳官舍清閑正向北堂樹萱草 距周甲
尚兩載仙山歸去遽從西母看桃花

沈菁士太守輓聯

癸丑夏余在京師乞假南旋眷屬先發余寄居君
廨數日及君罷官歸主講詁經精舍未久辭去余

遂承其乏于今三年矣聞君歸道山感念今昔寄
此聯輓之

京國整歸裝幾日從君商出處 糊樓開講席三年讓
我養疏頑

王子勤觀察七十壽聯

觀察以五月十日生有子十一人許信臣前輩其
門下士也屬與此聯

舞綵滿華堂看膝前簪笏成行以八龍兼三鳳 稱觴
進蒲酒願林下康強逢吉從夏五祝秋千

湯敏齋太常輓聯



太常爲協揆文端公次子咸豐庚申歲疏陳時事
與當軸者不合遂引退今年卒于吳中廡廡其長
子名紀尚聞頗能繼其家學也

頓失老成人憶咸豐季年闕下封章持正論
重披世系表溯文端遺澤牀頭祖笏付佳兒

恩竹樵方伯五十有四壽聯

方伯喜吟詩與余唱和無虛日六月十一日其生
日書此爲壽

白香山五十四官蘇州早見詩篇滿吳郡
范純仁六月中賜生日行看制草出坡公

楊母丁淑人輓聯

淑人能詩工書曾割臂肉和藥療君姑之病所適
楊君秉字子宣宦游浙江辛酉之春死寇難夫忠
婦孝是可傳矣

有令德有清才不媿聲稱是賢母
一忠臣一孝婦最難伉儷並傳人

晉洵美明經輓聯

明經乃陳碩甫先生之高足弟子其沒之夕有星
隕之異碩甫先生名奐精毛詩學居吳下之南園
學者稱南園陳先生也



東壁賈文光一星炯然果應此老 南園訪喬木三吳
學者又失斯人

周母沈太夫人輓聯

太夫人爲縵雲侍御前輩之母年八十六而終
躋八秩更六齡富貴貧賤患難處之夷然屢承芝誥褒
揚有是兒有是母 以一身兼五福康寧令德考終數
者備矣請看麻衣羅拜又多子又多孫

惲次山撫部輓聯

撫部以庶常改吏部官至湖南巡撫罷歸乃家兄
壬甫太守癸卯同年也年來同廬吳下時相過從

所居有櫟樹余去年爲書櫟存早堂額不意其櫟
作古人也

大雅宏達是名翰林清通簡要是官吏部嚴明仁恕是
封疆重臣遺愛長留荆楚地 論芸香俸爲前後輩編
花萼集爲同年生訂編紵交爲吳中老友傷心怕過櫟
存堂

沈仲復觀察五十壽聯

觀察生于九月四日時方從常鎮道調蘇松太道
尚未埭新任也

爲第一泉小駐行旌英蕩將臨黃歇浦 先重九日特



開公宴茱萸預佐紫霞觴

又

觀察實生于九月十日前聯小誤復謾是聯

以玉堂客作金山主人旌節將移且爲第一泉小住
歌鶴南飛和大江東去茱萸未老好補重九日清游

潘少梅明經輓聯

少梅乃余兄子黼堂之婦翁也工舉子業屢困場
屋晚年完宗文義塾事余在西湖講舍頻與往返
今年四月六日余將還吳下尚話別於塾中不意
別未數月遂作古人也少梅有子曰鴻字儀父乃

詰經精舍之高才生去歲已舉於鄉矣

論年齒宜兄事論昏媾是親家憶浴佛前兩日話別依
依何意重來失良友 以道義式鄉閭以舉業訓後進
與及門二三子談文娓娓所欣繼起有佳兒

財神廟聯

潘玉泉觀察屬謨久無以報命偶於舟中集四書
語作二聯與之亦不知其果用否也

無以爲寶惟善以爲寶則財恆足矣 義然後取人不
厭其取又從而招之

生財有大道則拳拳服膺仁是也義是也富哉言乎至



足矣 君子無所爭故源源而來孰與之天與之神之
格思如此夫

又

西湖孤山有財神廟廟中聯語無一佳者余擬書
此聯懸之未果也

梅鶴洗酸寒且教逋老揚眉葛仙生色

鶯花添富麗

恰稱金牛湖上寶石山邊

李少荃爵相五十壽聯

余與相公爲甲辰同年聞其於同治十一年正月
五日慶五十壽寄此聯祝之公時爲直隸總督

以歲之正以月之令春酒一尊爲相公壽 治內用文
治外用武長城萬里殿天子邦

汪蓮府駕部六十壽聯

駕部乃 先君門下士余三十六年來老友也以
孝廉官卽署未久卽移疾歸新安故里以齒德爲
一鄉望今歲行年六十矣十一月二十日其生日
也余方在西湖詒經精舍寄此壽之

北闕賦歸田歸然作東魯靈光際一陽始生逢六旬初
度 西湖勞望遠安得跨南飛瑞鶴來桃花潭上拜柏
葉仙人



柳母俞孺人輓聯

孺人乃柳質卿孝廉之母議者以孝廉有前母宜稱繼母孝廉以書問余余按儀禮喪服篇繼母如母疏曰繼母本非骨肉故次親母後然則以親母而謂之繼母義不可通矣孝廉從余言遂稱先妣余因書此聯輓之

生稱母死稱妣必也正名一字記曾參末議 鍾氏禮

郝氏法幸哉有子九泉會見賁恩綸

羅壯節王貞介兩公祠聯

壯節名遵殿乙未進士浙江巡撫貞介名友端丁

未進士署浙江布政使同死庚申之難者也浙江省城新建兩公祠高滋園都轉屬題此聯

出名進士起家爲名臣一開府一開藩浙東西崇德報
功人與白蘇共千古 是大丈夫出身臨大節以死戰
以死守城內外矢窟援絕天教巡遠作雙忠

曾文正公輓聯

余受知文正最深庚戌進士覆試公充閱卷官以
余詩有花落春仍在句期許甚大余以春在名堂
識感亦識媿也山積木壞吾將安仰於輓聯仍及
此意追惟昔歎曷勝泫然



是名宰相是真將軍當代郭汾陽到此頓驚梁木壞
爲天下悲爲後學惜傷心宋公序從今誰誦落花詩

吳仲雲制府輓聯

制府爲嘉慶甲戌翰林至余庚戌入詞林爲一十
九科前輩矣官至雲貴總督引疾歸門戶蕭然與
寒士不異晚年主講敷文書院與余所主詒經精
舍止隔一西湖也

樹滇黔數萬里外威名歸卧林自亦一品門庭若寒素
湖翰苑十九科前老輩叨陪杖屨以半年壇坫共湖山

吳曉帆方伯輓聯

曉帆曾攝蘇藩有宦蹟歸里後於里中善舉皆力
爲之余今春至福甯省親曉帆使人至江干爲余
問船價甚拳拳不意自閩中還遽哭其死也

送我八閩游何意歸來失良友 惟公一鄉望深爲吾

黨惜斯人

吳母徐太夫人七十壽聯

太夫人爲吳子儁庶常之母布衣蔬食貴而能貧
庶常先以軍功積官至觀察辛未會試入詞林鄉
人榮之時余與同寓吳中以此聯爲壽

芝譜日邊來積半生克儉克勤天以佳兒報賢母 版



與奕不駐願此後多福多壽人從盛夏祝長春

恩竹樵申丞五十有五壽聯

竹樵吾詩友也六月十一日為其生日余去年曾

壽以一聯今又贈此時奉命攝蘇撫矣

歌詠滿三吳喜玉節金符新自屏藩晉開府 唱酬同

一集願冰桃雪藕長從六月祝千秋

翁母許太夫人輓聯

太夫人為常熟翁文端相國原配藥房中丞同書

玉甫中丞同書叔平閣學同書皆其子也夫為宰

相子孫皆狀元極筭珈之至榮其歿也 詔書褒

美 賜祭一壇蓋曠典也文端為先朝議君同年

越以年家子敬獻此聯固未足掄揚萬一耳

夫為宰相狀元子狀元孫看門庭武達文通世代勳賢

會見草平承舊業 帝褒賢母御賜祭御賜葬極恩禮

隆天重地年家子姓敬從鍾郝緬遺徽

高辛才觀察八十壽聯

觀察名應元乃嘉慶癸酉拔貢仕至四川永寧道

引疾歸因故里富陽無家廬居杭州時又自杭移

蘇將至揚州因其孫從長蘆改官兩淮入京師引

見將歸也八月下旬遇其生日以此聯為壽

泛宅到三吳喜捧檄而歸日下蘭孫新得意 縣弧逢

八月想稱觴一笑月中桂子其長生

又

代許信臣前韻

吳下故人來是六十年前總角舊交皓首龐眉登八十

孤南壽星見正中秋節後縵亭高會瓊樓玉宇慶千

秋

許母姚太夫人七十有八壽聯

太夫人為許小舫太守之母九月二日其生日也

躋七十又八齡萱壽行看登百歲 先重九只六日菊

花剛好祝千秋

汪瘦梅水部輓聯

余未通籍前館新安汪氏最久水部即彼時從學

者也舉孝廉官水部未成進士鬱鬱成疾卒於京

師其弟芙青隴尹八都奉其靈輿挈其妻女以歸

途中又亡其長女今僅存一女是亦可哀也已余

去新安二十二載然故交零落殆盡今又哭君不

自知其言之悲也

置身郎署十六年名心未死病骨遽銷孀妻弱弟扶旅

櫬而歸到此膝前止存孤女 回首新安廿二載館舍

荒涼知交零落感舊傷今向秋風一慟痛吾門下又失
斯人

劉聽襄庶常輓聯

庶常乃丁未前輩也余主講誥經常相見今年四
月間猶來湖上長談半日及九月中再至西湖則
已作古人矣

溯廿年前詞館清聲林下相逢尊老輩 憶四月中湖
樓閒話秋來重到失良朋

蔣紅小築聯

蘇州山塘斟酌橋新修東陽張忠敏公祠旁屋數

楹應敏齋廉訪署曰蔣紅小築頗有泉石竹籬荷
沼楚楚可觀癸酉秋余將有武林之行倚裝題此
小築三楹看淺碧垣牆淡紅池沼 相逢一笑有袖中

詩本襟上酒痕

陳母湯太淑人輓聯

淑人爲陳仲泉觀察之母嘗偕贈公南至廣西西
至甘肅備嘗辛苦贈公卒哭之失明今年冬歿於
直隸仲泉觀察需次吳中聞信奔赴余與觀察同
年故輓以此聯

淚眼十年枯憶從前辛苦隨夫紙閣蘆簾遠歷關山到



秦隴 悲風千里動憐吾友倉皇聞訃麻衣桐杖獨衝
風雪到幽燕

倪母張太夫人輓聯

太夫人爲載軒觀察之母其卒也有姑在堂
封膺一品壽屆七旬城黨流傳共羨膝前有賢子
黍
谷陽回萱閣春去歲除將近最難堂上慰慈姑

吳室孫夫人輓聯

夫人爲吳彤雲觀察之配幼失怙恃育於兄嫂既
歸吳撫八歲小姑以迄于嫁亦如其兄嫂中年挈
子女避兵辛苦備嘗遂得拘繫之疾困頓牀席者

幾十年將卒猶命其子善事庶母亦云賢矣

噩耗到江南溯自早歲零丁中年離亂暮齒又疾疢纏
綿何怪神傷苟奉倩 褒揚來日下想其勤儉相夫孝
友勗子恩義逮徧妻女妹允推閨範宋宣文

汪觀瀾封翁與劉夫人輓聯

封翁與夫人結滿六十載於壬申年重行合巹之
禮至是年十二月夫人卒明年元旦封翁卒相距
九日亦人瑞也

倡隨到六十年白髮蒼顏已屆耄期重合巹 考終完
九五福年頭臘尾未踰旬日兩游仙



沈韻初中翰輓聯

中翰嗜書畫癖金石問字於余十餘年矣頻以金石疑義相質洵門下一佳士也卧病一載竟以不起其母夫人猶在堂是可傷已

一載卧沈病李賀牀頭呼阿嬾 十年問奇字楊雲門
下失侯芭

賈耘樵觀察輓聯

觀察以縣令起家曾攝蘇臬

陳臬蘇臺長使吳兒歌賈父 照心詩水閣更無耘老和
坡翁

丁濂甫學使同年輓聯

學使視學吾浙今春招同社一蓮衛侍郎小飲於其署齋皆庚戌同年也出所著蜀游草一卷屬余商定又畫橫幅及團扇見贈乃未數月而遽歸道山矣可傷也

小集三同年杯酒清談猶憶同商蜀游草 傷心一分
手畫圖留贈不能再寫浙中山

潘母汪太宜人輓聯

宜人爲潘蘭儀司馬之母卒於同治十二年閏六月之朔年七十四生七子今存其二有孫八人守



節四十餘年其長女守貞不字先母卒同治八年
母女同請 旌倪載軒觀察厲蘇爲其西鄰屬代

撰斯聯

青燈四十載獨抱冰心歎膝下佳兒止存雙鳳閨中貞
女先跽孤鸞老景逼桑榆半死枯楊遭閔厄 丹詔九
重天特褒苦節算萱花慈壽已過七旬桐樹孫枝剛符
八士高風留綽楔平分清籟到鄰春

魁時若將軍七十壽聯

將軍生於閏六月至癸酉歲行年七十又逢閏六
月時官成都將軍許信臣前輩屬撰斯聯寄之

周亞夫真將軍溯從前崧生嶽降正碧梧益葉之年而
今八秩初開清簟疏簾又駐羲鞭逢閏六 郭汾陽大
富貴看諸子武達文通如琪樹凌霄而起從此一門鼎
盛木公金母好書獨錦祝秋千

朱久香前輩輓聯

先生安徽學政報滿卽謝病歸餘姚故里曾以花
陰補讀圖屬題今年又屬書四明樓額未及書而
先生歸道山矣公子鎮甫孝廉當先生七十生日
乞言爲壽曾以三老碑爲贈乃餘姚客星山中新
出漢碑也



謝蕩節而歸田故山泉石前輩風流沒世無慙三老碣
坐花陰以補讀碩德雖亡遺書猶在拈毫敢署四明
樓

何子貞前輩輓聯

先生在史館曾建議修三品以下列傳卒不果行
晚年居吳中於維揚書局刊大字本十三經注疏
手自讎校甫畢毛詩從事三禮未卒業而歸道山
先生書名滿天下爲當代魯靈光余辱先生知愛
書此聯晚之舉其大者其餘瑣瑣可無述也

史館建嘉謨惜創議未行三品下庶僚至今無列傳

講堂刊定本柰校讎方半九經中大義從此付何人

金小韻太守六十有九壽聯

太守由臧尹累擢至知府歷佐戎幕有聲三子五
孫濟濟稱盛其曾祖母在時曾有五代一堂之慶
庶幾其再見乎

六秩又九齡湖起家禹筴歷佐戎旃此後勲名殊未艾
一堂曾五代看伉儷齊眉兒孫繞膝從前佳話定重
來

徐誠庵大令輓聯

誠庵爲余三十八年前同補博士弟子員老友宦



游吳下不得志而沒然所誤詞律拾遺實足爲萬
紅友功臣余嘗爲序而行之半世苦心庶其不負
乎

補四百餘闕新聲傳世應偕萬紅友 溯三十八年舊
夢與君同是一青衿

德清烏山地廟聯

余舊居德清烏巾山之陽距所居里許有土穀祠
父老相傳曰堯皇土地不知何義然長輿有堯市
山一統志云堯時洪水民避難於此成市則吾邑
有堯時迹亦無怪也歲在癸酉廟重脩落成爲題

此聯

耕而食鑿而飲相傳中古遺風尚留邨社 春有新秋
有報願興故鄉父老同拜神旗

台州東湖湖心亭聯

台州之有東湖猶杭州之有西湖也出東郭門不
過半里湖光山色與西湖無異隔以長隄分裏外
湖其外湖有湖心亭傑閣三層登臨最勝爲題此

聯

好水好山出東郭不半里而至 空晴空雨比西湖第
一樓何如



江蘇藩署聯

同年應敏齋廉訪攝蘇藩屬擬署中櫺聯未知果
用否

燕息敢忘天下事 和平先養一家春

石內室

小集賓僚同骨肉 縱談政事即文章

右客坐

趙母蔣太恭人八十壽聯

恭人為趙兩田大令之母生三子皆成立其前室
所生子已有曾孫在恭人為五世同堂矣四月二

十七日其生日也

萱花不老芝草有根已見一堂羅五代 八秩初開百
齡將屆好從首夏祝長春

杜筱舫觀察六十壽聯

觀察初學申韓家言從鹽官起家歷署藩臬著有
古謠諺及平定粵寇紀畧江南北大營紀事本末
及萬紅友詞律校勘記始生時其大父夢一老僧
擔簾入室蓋有夙根云

從名法入手由鹽官起家而陳臬而開藩意思蕭閑其
識東坡是五戒轉世 紀近代戰功輯古來謠諺又工

詞又能書精神淵著請歌南山之六章壽公

海盜觀音殿聯

同治三年海盜猶陷賊中於北門內後街民間屋
壁得八面觀音銅像一尊不知何年所鑄也因供
奉天后行宮而是年官軍即收復海盜浙西以次
肅清蓋慈容見而劫運消非偶然也寺僧仁壽屬
題爲書此聯

八面現金容看一出人閒便消劫運 十方瞻寶相願

大家心上各發慈悲

理安寺靜室聯

理安寺燬於賊新築靜室三楹余海游九溪十八

湖必至此小坐因書一聯

竹筧潛通十八湖 蒲團小坐兩三時

峩眉山館聯

吾浙布政司署前有山俗呼管米山以宋糧料院
得名實則爲峩眉山同治甲子歲諸同人於其地
建崇義祠祀庚卒死難諸公祠之右積石嗟峩乃
山之峩也而峩築屋三間顏曰峩眉山館並移大
洞經閣宋思陵御書道德經石幢於其前丁君松
生屬題楹帖率書十四字至山名峩眉不知何取



或如太平寰宇記所載南浦縣蛾眉磧以形得名乎

古臺尚存宋時石 遙青如對劉中山

湖心亭聯

聖因寺僧永清屬題

四面軒窗夕小坐 一湖風月此平分

徐莊愍公祠聯

公名有壬歸安人官江蘇巡撫庚申城陷死之其妾施氏子震翼及一女皆死幕友僕妾從死者五人同治十三年建祠蘇州同鄉諸君屬題此聯按

謚法履正志和曰莊使民悲傷曰愍聯語用之附記以告觀者

仗節鎮危疆當軍事土崩瓦解不可收拾之時視城中無固志視城外無援兵糜頂踵以報君恩婦豎與臺同授命 結纓完大義與謚法履正志和使民悲傷有合在吳會爲名臣在吳興爲先達節春秋而修祀典日星河嶽其昭垂

莫愁湖勝棋樓聯

樓有徐中山王像相傳王與明太祖奕棋而勝卽以此湖賜之湖中荷花彌望無際



全湖綠水芙蓉勝國君臣棋一局 看終古雕梁玳瑁
盧家庭院燕雙棲

馮景庭宮允輓聯

宮允以庚子第二人及第遷中允後卽乞歸優游
林下潛心著述物望甚隆又善治生今年夏以老
病終時乃修蘇州府志未竟深爲三吳文獻惜之
富貴壽考重以科名奠海內知交都無此福 儒林文
苑兼之經濟歎吳中耆舊頓失斯人

贈張任庵同年聯

仕庵同年名保

光己酉舉於鄉庚戌成進

士其嗣君瀚堂中翰名德需以同治癸酉舉於
甲戌成進士父子並以酉戌聯捷亦科名佳話也
北山梓南山橋聯步到桂宮杏苑 酉年科戌年第成
名占後甲先庚

贈潘築巖茂才聯

茂才爲相國潘文恭公之孫娶道光壬辰狀元吳
崧甫侍郎之女於十月初旬親迎成禮書此賀之
門第舊金張喜宰相文孫剛配狀元嬌女 倡隨小梁
孟締百年嘉耦恰當十月陽春

潘季玉觀察六十壽聯



觀察爲文恭相國之子以刑部起家庚申之亂克復蘇州與有力焉有子四人孫十餘人夫人同享眉壽於今年十一月初旬稱六十之觴書此壽之相門碩望郎署清才功德在珂鄉驥子龍孫能濟美一陽將生六旬初度笙歌圍綺席木公金母共長春

張太夫人輓聯

太夫人爲振軒中丞之繼母今年九月卒於江蘇

節署

玉帳動金風吹散慈雲剛九月 北堂拜西母畱將福蔭在三吳

鄒蓉閣縣尉輓聯

蓉閣能詩錢塘人官長洲典史蓋賢而隱於下位者也今歲杭州老輩高辛才觀察張仲甫中翰先後下世蓉閣繼之不勝耆舊凋零之感

耆舊歎凋零杭郡連傷三老輩 閒官擅風雅吳中頓

失一詩人

楊石泉中丞四十有九壽聯

中丞生於九月九日時適請覲 朝廷以海疆有事未允也

仗節久西湖纔見仙籌添大衍 攜香遲北闕好憑春



酒醉重陽

高辛才觀察輓聯

觀察名應元富陽人登嘉慶癸酉拔萃科以縣令
起家仕直隸河南最久後遷四川永甯道引疾未
赴余昔年奉使中州以歲科兩試至懷慶君適爲
太守甚相得庚辛之亂余避地天津君亦寓此過
從益密及余南還寓吳中而君亦歸訪我春在草
堂嗣是無歲不於蘇杭相見今年夏間君移家自
揚州歸杭道出吳中向余借西湖話經精舍暫住
不意其竟卒於是也聞君易簀時其家人焚寓車

萬馬皆騰空而起高出樓屋不知所之意其必生

天矣

浙水舊文雄明經釋褐縣令起家雖錦江玉壘未莅雙
旌至今治譜流傳三輔兩河猶歎美 覃懷賢地主同
客津門重逢茂苑看皓首龐眉將登九秩何意湖樓暫
借雲車風馬遽來迎

張仲甫先生輓聯

先生登嘉慶庚午賢書其先德適官閩撫謝恩疏
入 仁廟御批欣慰三字同治庚午重賦鹿
鳴所著春秋屬辭辨例一書曾呈 乙覽亦儒



者之至榮矣

昔年碩德兩賦鹿鳴篇憶從前初奏笙簧喜動天顏曾
一笑 辨例屬辭獨得麟經意想此後不祧俎豆長傳
絕業到千秋

高滋園都轉六十壽聯

都轉官浙最久厯官至鹽運使署按察使加二品
銜引疾歸仍居杭州今歲行年六十九月二十四
日其生日也

官兩浙近卅年以二品歸田仍在白蘇舊治 過重陽
剛半月爲六旬介壽恰當黃菊新花

江室仇夫人輓聯

夫人爲江小雲觀察之配通文墨而不爲詩詞喜
觀史每以史中可法可戒事爲子若婦言之尤好
施與能急人之急庚申辛酉之亂戚黨中往依之
者人人欣助之幣所有不惜臨終自爲輓聯曰平
生儘爲誰忙代夫子辛勞收分人已家法原非我
設受祖宗懿訓敬告兒孫烏呼是亦女有士行者
矣

以巾幗中人常落落然有儒生氣象有豪傑襟懷日對
青史一編迥異尋常脂粉輩 當緜惓之際所拳拳者



在祖宗懿訓在兒孫家法手題總帷數語豈惟明白去
來間

無錫惠山五中丞祠聯

五中丞者海忠介瑞周文襄忱周懷魯孔發湯文
正斌李文恭星沅也祠成後應敏齋同年屬題

自勝國至熙朝歌詠不忘四百年來五開府 以事功
兼學術馨香無愧九龍山下一崇祠

吳山倉頡祠聯

吳山新建倉頡祠前臨浙江後枕西湖形勢殊勝
矢康甫大令之所定也康甫屬題此聯

上溯羲皇畫八卦時文字權輿秦而篆漢而隸任後來
繚素流傳不外六書體例 高踞吳山第一峰頂川原
環抱江爲襟湖爲帶看從此菁華大啟振興兩浙人材
倪載軒觀察輓聯

觀察山縣令起家以道員候闕未補官也數年前
曾買蘇州大儒巷屋居之余爲題其舫齋曰小搖
碧今年就余商量擬疊石穿池略仿余曲園規制
未果而卒

卜宅闔閭城園林花木猶待評量遠歸海上仙龕冷落
空齋小搖碧 歷官觀察使霖雨經綸未遑展布徒令



吳中父老歆歆遺愛古龔黃

吳中二程子祠

爲恩竹樵方伯作

後尼山千五百年篤生兩先生闢邪說辨異端道統天
開正所以下啟紫陽上承鄒嶧 環蘇臺數十萬戶過
此一瞻拜黜浮華崇實學士風日起庶不愧言游故里
秦伯遺封

楊石泉中丞五十壽聯

中丞生於九月九日去年四十有九曾贈一聯今
年正五十矣因又贈此是歲爲光緒元年 恩科

鄉試中丞充監臨官又爲武闈主考也

鍾三湘秀氣爲兩浙福星奮武揆文恰值賓興大典
借九日秋光獻五旬春酒翔機集椒恭逢御極初元

石門高氏祠堂聯

高氏出齊公族由穀熟遷姑蘇晉元興時又由蘇
遷池州其地在九華山西南曰魁峯曰石門曰桃
塢皆其地也高滋園都轉屬撰祠堂楹聯因據其
家譜所云爲題長句

卜宅晉元興石門秋色桃塢春風聚九華秀氣緜延累
代簪纓後裔至今懷祖澤 溯源齊公族穀熟分支姑



蘇別派守百禩清芬崇奉不祧俎豆先祠終古傍魁峯
許母盧太夫人輓聯

太夫人乃余次女之姑也余親家翁季傳孝廉爲
山東掖縣令卒於官身後無餘貲夫人拮据支持
歷十餘年心力交瘁所生二子長曰觀身字子賓
由拔貢生舉孝廉以病廢次日祐身字子原則余
女婿也亦已捷於京兆矣餘三子皆庶出

有弱女感姑恩爲言辛苦持家十載傷心搔白髮 勸
諸孤成父志會見聯翩競爽一門接踵到青雲

蒯士香同年廉訪七十壽聯

廉訪出知縣起家官河南光州牧時戰功甚著張
朋齋軍門以姻家子爲帳下健兒今官至提督立
功塞外爲當代班定遠矣余與廉訪甲辰同年也
故以此聯壽之

溯轉戰申息開軍前部曲萬里封侯白髮坡仙猶坐冷
泉判公牘 憶同登甲辰榜都下讌游卅年成世黃花
魏國長從老圃看秋容

此聯會面爲廉訪誦之本擬還蘇寓後買長箋寫
寄乃未及寫而廉訪逝矣因易其語曰溯轉戰申
息開軍前部曲萬里封侯至今鬢雪飄蕭尙有雄



必談往事憶同登甲辰榜都下讌游卅年成世可
歎晨星零落又將清淚哭明公不勝故舊凋零之
感矣

金眉生廉訪六十壽聯

眉生喜談經濟意氣浩然亦當代振奇人也值其
六十生日以此壽之上聯用陳同甫語非此老不
能當下聯則用香山太傅耳順吟中語

推倒一世豪傑拓開萬古心曾陳同甫一流人物如是
如是 醉吟舊詩幾篇聞嘗新酒數盞白香山六十歲
時仙乎仙乎

沈蘭舫廣文五十壽聯

余曩居臨平時蘭舫曾受業焉其地有臨平湖所
謂東湖者也比年來余主講西湖詰經精舍蘭舫
又充監院官光緒元年值其五十初度蓋小於余
者五歲而其生日爲嘉平朔則又先我一日因自
吳下寄此聯壽之

共學東湖同客西湖坐對臘燈懷舊雨 五年遲我一
日先我互斟春酒祝長生

張母彭太宜人輓聯

太宜人生三子長曰紹渠以進士作令吳中次日



紹軒余視學中州時所取士也三曰紹潛亦諸生
紹渠子德迪已入詞館矣太宜人年八十而卒寄
此聯輓之

問俗到中州記壺史流傳於孝友門風見宣文母範
享年登大耋況家聲鼎盛有琴堂令子與芸館賢孫

吳母朱太宜人七十壽聯

太宜人爲時山大令之母光緒二年正月八日其
七十生日也己有曾孫矣

羅四世於一堂有子有孫曾再茁蘭芽便成五代 出
七旬而百歲日耄日期頤每逢穀日敬祝千春

許雪門太守六十壽聯

雪門工詩自編其詩自道光庚子至咸豐壬子爲
悠游集自癸丑至同治癸亥爲蒿目集甲子以後
則爲上元初集時之治亂具見其詩光緒二年正
月七日爲六十生辰以此聯壽之是歲正月初十
日立春

先立春三日作生辰千萬戶柏酒桃湯敬爲使君壽
合大集一編卽年譜六十歲前憂後樂又到上元初

王補帆中丞輓聯

中丞爲余庚戌同年同官翰林在京師時晨夕往



還無聞也遂以余長女妻君仲子年來君歷官至
閩撫所至有聲今年駐節臺灣辦理招墾之事甫
還省垣遽捐館舍雖 恩禮優渥亦可哀矣去年
在吳中與余倡酬和人字韵各十餘題此樂詎可
再邪

乘桴過斗六門邊瘴雨蠻煙不辭辛苦立功在絕徼盜
視儻鄭尤難偉矣半載經營盡闢天南生熟地 回頭
思廿七年事敝車羸馬時相過從同譜若弟兄遂訂朱
陳之好傷哉一朝訣別未完吳下倡酬篇

瓜爾佳李夫人輓聯

夫人爲恩竹樵方伯之配方伯之攝漕督也夫人
與偕及回蘇藩任方伯南來夫人北去遂別矣方
伯爲余詩友槐雲館其所居齋名也

使節記南來漂母祠邊遂成長別地 吟懷勞北望槐
雲館內添得悼亡詞

朱母趙太淑人六十壽聯

淑人爲朱竹石司馬生母有子三人其生辰爲正
月二十四日前期三日爲其幼子梅石娶婦

三珠樹環侍一金萱添箇比肩人來助綵衣舞 周甲
年剛逢建寅月畱將婪尾酒敬祝錦堂春



葛母李太夫人輓聯

太夫人爲吳縣葛瑞卿明府之母河南許州人也
行年八十卒於吳縣署

二品紫泥封頰上版輿花縣迎來眾母母 八旬黃髮
壽吳中丹旌籀歌送到大家家

張少渠別駕五十壽聯

少渠性好善遇善舉必勇爲之去年四十有九奉
檄預江蘇海運之役將附福星輪船以行忽捨之
而就他船福星船竟沈於海君幸而免僉曰是好
善之報也今年五十矣因書此爲壽

不福星真福星卽此一言可爲君壽 已五十又五十
請至百歲再徵余文

佛殿聯

三藐三菩提與大眾同游淨土 一花一世界看我佛
卽在靈臺

費室張夫人輓聯

夫人爲費幼亭觀察繼室幼亭寓吳下方議遷寓
夫人日閒猶爲相度新居其夕遽卒

吳下議移家停車半日相度新居何期驟中膏肓仙夢
三更俄跨鶴 天邊榮錫諧隨宦廿年勤勞內治忍使



未衰夫婿傷心一曲賦離鸞

顧室葉淑人輓聯

淑人爲顧竹城明府之配年五十九四月三日卒
鶴壽未六旬仙去後一年再向仙山獻壽 鶯花過三
月佛生前五日遽歸佛地拈花

趙忠節公祠聯

公諱景賢字竹生余甲辰同年也粵賊之亂起義
兵衛鄉里守湖州城三年城破後陷於賊罵賊死
在朝忠臣在鄉義士百戰艱難至死不二 有唐睢陽
有宋信國千秋俎豆得公而三

自題春在堂聯

先祖南莊府一君嘗舉韓昌黎詩此日足可惜一語
以勉人曰此語極有味試思明曰亦日也然非此
日矣明年亦若此日也然非今年此日矣然則古
人惜分陰豈徒過乎蓋府君篤志於學故其訓人
若此又先舅正氏姚平泉先生嘗自言以出世之心
行入世之事則言亦極有味憾因竊取此二意爲
一聯異日當書而懸之春在堂焉

日有明年之日年非今日之年吾祖南莊府君是以垂
惜日之訓後人宜敬體此意 事或入世之事心仍出



世之心先舅平泉老人用此爲處事之方小子竊有味
其言

楹聯錄存二

徐雲階部郎輓聯

德清俞樾

雲階爲震澤縣之震澤鎮人曾舉義兵衛鄉里亂
後又勦辦善後之事其沒也余銘其墓

負幹濟長才小試於鄉已爲遺黎復元氣 綜生平義
舉大書其事愧無巨筆誌幽宮

陳子舫太守輓聯

子舫爲先兄癸卯同年以太守候補江蘇卒於江
甯



二千石太守清貧雖負長才未施利器 三十載同年
寥落既傷老友更念先兄

陳母繆淑人輓聯

淑人爲同年陳訐堂司馬之母其家始極貧淑人
具饘粥食舅姑而自掘野菜作羹以充饑訐堂官
吾浙就養浙中者數年然勤儉如故也卒年七十
七

多福多壽過七秩又七齡芝誥榮封大好桑榆新景色
克儉克勤歷一生如一日版輿就養未忘藜藿舊家
風

濮少霞觀察七十壽聯

少霞舊宦蜀光緒三年正月其生日也

陸放翁於老學庵中話成都舊游燈市笙歌正月節
白樂天從大歷年閒到會昌初載香山詩酒七旬人

鄭畬香孝廉輓聯

孝廉太湖東山人曾官戶部光緒丙子十二月自
湖北歸卒於滬濱時其父年六十餘矣

臘鼓動悲音千里征帆輾軸迎歸黃歇浦 春明樹文
望一官農部科名盼斷白頭親

張母孟太夫人輓聯



太夫人爲同年子青制府之母年九十矣正月十
八日其生日也於正月三日卒

一品紫泥封看膝前令子賢孫更有曾孫同躡踊 九
旬黃髮壽正歲首良辰吉月再遲半月卽稱觴

先是余曾爲壽聯將書而未果不意遽易壽爲輓
也因亦附錄於此云養志在東山看膝前有令子
有賢孫有婚冠之曾孫會見一堂成五代騰歡徧
南服自口下而梁園而吳會而閩浙諸都會齊從
正月祝千春制府曾官豫撫由河督漕督移撫三
吳遷閩浙總督陳情乞養故聯語云然也

錢太淑人輓聯

太淑人爲子密樞部之母女而有士行者錢故禾
中望族太淑人嘗舉其先世故事訓其子孫云
九五福合德考終向來尹吉遺型彤史允堪輝柱下
六十年清門舊事此後孫曾環立白頭無復話鐙前
吳勤惠公輓聯

公名棠以縣令起家官至四川總督以病乞歸到
家九日而卒亦咸同閒名臣也余曾承其延主受
經書院以遠不赴今聞其卒擬以一聯輓之因循
未果萬小庭大令其門下士又有葭葦戚屬余代



撰此聯因錄而存之

由牧令起家不十載簡在帝心而監司而開府卅年來
勤政惠民允推柱石勛名豈僅偏隅資保障 從成都
返旆只九日身騎箕尾若闡浙若江淮千里外報功崇
德何況葭莩戚誼曾陪小坐在門牆

沈母張太恭人輓聯

太恭人爲翠嶺沈君之配樂善好施道光二十九
年大小沈君借庵村報恩寺設局養饑民太恭人
手製綿衣數十褶以賜又嘗乘舟之平望過楊家
蕩遇風乃命其孫中堅召水工於下流最深處築

堤三十丈有奇至今賴之

嘉言懃行落落數大端至今客路經過楊蕩隄邊定有
叢生慈竹 仁粟義漿孳孳八十載長使災黎感泣庖
村寺內領來手製寒衣

浙紹會館聯

在蘇州盤門新橋巷余爲題二聯一懸客坐一聯
戲臺

游宦到金閶把越酒話鄉關如讀會稽三賦 清時調
玉燭借蘇臺成雅集勝在永和九年
高會卽蘭亭敘觴詠幽情更饒絲竹興 新聲徵菊部



對蘇臺風月應憶鏡湖遊

周琳粟觀察輓聯

觀察以孝廉官天津府知府遷天津河間兵備道
四十外卽謝病歸卜居於杭州橫河橋有園林之
勝光緒二年卒齒未五十余在天津與君相識君
時猶中書舍人也

剛七載臥林泉最憐甲第經營便有青山終老意 由
一麾遷觀察回憶丁沽款治及君紅藥賦詩時

鍾子勤孝廉輓聯

子勤精毅梁之學著毅梁補注二十四卷主講上

海敬業書院者十餘年余每至滬必與討論經義
今不可得矣其歿也年六十

廿四卷補注爲毅梁子功臣頻年手校青編鑱版告成
猶及見 六十歲耆儒是乾嘉閉宗派此後我來黃浦
談經同調更無人

沈母李氏蔣氏兩太夫人壽聯

李爲沈蓮溪觀察之配蔣爲沈雪門廣文之配婦
妣也觀察公爲嘉慶丙子優貢廣文公則是科領
鄉薦皆 先大夫同年也光緒三年李年七十蔣
年八十書森太守乃廣文公子而嗣觀察公者也



奉兩太夫人於八月十三日合而稱觴云

鍾夫人禮郝夫人法登八詠樓互相輝映 七十日孝
八寸日孝唱百年曲同到期願

朱母趙太淑人七十壽聯

太淑人爲朱少虞農部之母其君舅曾爲某縣校
官太淑人從之鬢舍奉侍甚謹光緒三年年七十
矣少虞迎養於京寓九月中其生日也寄此聯壽
之

佳節過重陽借九月鞠華祝七旬萱壽 慈顏生一笑
對綺筵甘脆憶冷著羹湯

杭州安徽會館聯

爲徽人之宦浙者作不知其書何人之名亦不知
其果用否也

游宦到錢塘飲水思源喜兩浙東西與歙浦江流相接
鍾靈自滄嶽登高望遠問雙峰南北比皖公山色何
如

八旗奉直會館聯

在吳中卽以拙政園爲之固三吳勝地也

勝蹟冠吳中有梅村詩句衡山畫圖坐對茶花思往事
名流來日下是豐沛故家金張貴姓好憑酒盞話昇



吳桐雲觀察輓聯

觀察為湖南沅陵人曾從戎幕有戰功後為曾文正公奏調江蘇統帶輪船遂歿於滬其生卒皆十二月初八日亦可異也

仕宦本勞人况當陽九年戎馬軍中應輪海上去來皆佛地兩逢臘入日西山毓秀申浦歸真

許季蓉明府輓聯

季蓉於兄弟行居第五乃信臣撫部之子官江蘇嘉定縣卒於光緒三年十二月二十七日其明年

二月乃信臣撫部八十生日也

何準第五許慎無雙祝堂上八旬正擬椿庭同舞綵

病共秋深算隨臘盡賸年前三日不能花縣再頌春

濮少霞觀察輓聯

少霞宦蜀中二十七年曾管前後藏及拉里軍糧府攝夷情章京督辦乍了夷務班禪喇嘛錄為弟子贈名羅桑策忍譯言心好長壽也光緒四年二月卒於家年七十有一

歷萬里以歸來巴蜀舊使君班禪大弟子踰七旬而化去神仙蘇玉局兜率白香山



馮竹儒觀察輓聯

竹儒觀察乞假出關奉其父尹平刺史遺骨以歸
適有 朝命引見乃疾行而返甫至滬濱遽捐館
舍其人有肝膽喜談經濟有用才也其祖子皋先
生實與 先君子同舉於鄉故有通家之誼在滬
上時與余交甚深今聞其逝不禁泫然寄此聯輓
之

負父骨而返聞君命而趨是真忠臣是真孝子 論人
才可惜念交誼可感一則公義一則私情

邵荻洲觀察七十壽聯

觀察以水部郎起家年古稀精神強固其幼子
卽今歲所生也嬰鑠可想矣

嬰鑠古稀翁添箇嬌兒作生日 清閒觀察使本來水

部是詩人

應敏齋同年適園聯

敏齋築適園於杭之忠清里泉石之勝與真山水
無異有三層樓登其上層則襟江帶湖空曠可喜
因集唐人張蠙王之渙句爲楹帖贈之語頗切合
惟張句上下易置則以楹聯體裁須諧平仄耳
似入萬重山不離三畝地 欲窮千里目更上一層樓



潘星齋侍郎暨陸夫人輓聯

侍郎乃吳縣相國文恭公仲子由翰林起家歷官
卿貳於光緒四年三月三日與夫人陸氏同日而
卒夫人卒於丑時侍郵卒於巳時可謂偕老矣
清望歷四朝承黃閣門風重登八座 仙遊同一日攜
白頭嘉耦俱返三山

金眉生廉訪輓聯

眉生負經世才喜談天下事亦古之振奇人也今
春招余游其偶園頗擅泉石亭臺之勝乃園中一
別竟爾千古亦可慨也

春初招作偶園游泉石幽深亭臺曲折花木扶疏忍拋
三徑煙霞海上仙龕遽歸去 酒後聽談天下事世運
升降學術盛衰政治得失空贖千秋著述山中經濟更
誰論

王母勞太恭人七十壽聯

太恭人爲王君夢薇之母嘉平八日其生日也
願歲歲今朝以臘入良辰陳秋千雅戲 祝婆婆老福
從古稀七十到上壽百年

童際庭觀察輓聯

觀察行年六才而卒距生辰止三日耳生平頗豪



修自喜身後門庭蕭索孤子纔五歲亦可哀也
懸弧數旦便是蓋棺期只爭三日光陰未滿六旬眉壽
綺席清歌變成蒿里曲堪歎一門細弱僅存五歲孤

兒

江硯雲封翁聯

封翁乃小雲觀察之父年至八十尚思游京師小
雲諫阻乃率全家卜居於畱下山中小築甫成遽
捐館舍因以此聯輓之時余正丁太夫人憂也
不輦輶卽林泉率全家入山必深知暮年尙抱權奇氣
以考終完老福與令子論交最久痛去歲同銜風木

悲

岳廟聯

杭城眾安橋畔爲岳忠武王初瘞處同治甲子吳
康甫大令勗議於其地建忠顯廟植柏於庭至丁
丑歲大雪枝幹分披遂至中裂異而諦視之則其
樹柏葉松身固檜樹也西湖岳廟舊有分屍檜前
明同知馬偉所植願彼則人力爲之此則天意而
非人力矣敬題此聯以誌靈異

老奸終古分屍鬼斧神斤劈開檜樹 快事一時撫掌
風欺雪虐壓倒秦頭



安徽會館戲臺聯

館中奉包孝肅朱文公栗主潘玉泉方伯屬題此
聯

菊部小排當聽他絳樹新歌好博河清同一笑
梓鄉
屢耆舊來自紫陽故里試將風景認三吳

衡峯和尚輓聯

和尚住蘇州寶積寺寺圯新之亂後又圯又新之
余有重建寶積寺記存碑文中和尚工丹青凡相
地相人及星命家言無不通曉余孫陞雲自幼多
病曾託其取一僧名曰蓮生云

積半生苦行經營碧殿頽廊從前寶地落成曾許簡陋
來作記 攜總角雛孫瞻仰紺眉藕髮此後香山老去
更無如滿共論交

高滋園都轉輓聯

都轉官吾浙最久曾權臬使及引疾後仍寓杭州
余與交最深今年春至杭則已病矣猶延入內室
茶話中庭良久而別別未月遽聞其訃悲夫

宦游兩浙幾及卅年從前憲府兼權棠蔭尚畱遺愛在
話別中痾未逾一月此後湖樓重到柳陰少箇故人
來



應敏齋方伯六十壽聯

敏齋與余同歲生道光甲辰年同舉於鄉今年皆六十矣十月二十二日其生日也其太夫人在堂年八十有七余寄此聯贈之并爲其太夫人壽也長於我一月有餘憶卅六年前同列賢書榜上並題年廿四親在堂九旬將屆合百五十歲三周大衍筵前兼祝母千秋

又爲杜葦舫觀察作

敏齋少年時無子五十歲後有丈夫子五自蘇藩乞養歸卜居杭州買忠清里沈氏宅極園林之勝

有三層樓登之則聖湖錢江皆了了在望亦壯觀也

母九旬兒六旬更欣繞膝人多商瞿五十歲後蘭玉叢生得崢嶸五男子官二品階一品尤喜乞身歸早靈隱三天竺外園林勝地有突兀三層樓

潘母胡淑人輓聯

淑人爲太傅潘文恭公孫婦東園君之德配也東園君年五十一而終其卒也以二月十九日淑人亦年五十一而終其卒也以六月十九日二月十九世傳觀音菩薩生日六月十九則言是成佛之



日此兩人者殆亦必有宿根者矣

佛誕誌觀音最難伉儷歸真季夏仲春同逢十九日
仙籌添大衍卻好期願分享錦琴瑤瑟合成百二年

吳平齋觀察七十壽聯

平齋好金石所著有兩壘軒彝器圖識余曾爲序
之今年爲其七十生日而余亦六十矣其所居曰
金太師場與余所居馬醫科巷前後相望蘇人所
謂隔一條巷者也

合千古之壽壽公永保用永保享左鼎右彝坐兩壘軒
居然三代上以十年之長長我六十耆七十老望衡

對字隔一條巷有此二閒人

楊振甫同年輓聯

振甫爲余庚戌同年同入翰林者也仕至廣東布
政使光緒五年正月三日卒於官其母沈太夫人
歿於四年十二月十八日相距止半月也振甫之
官時 召見問行期有母老途次不必急促之
命亦榮遇矣

從慈母以西歸雖隔歲未越兩旬回思宣室垂詢親老
途長曾荷殷殷天上語 哭故人於南海歎同年又弱
一个屈指玉堂舊友風流雲散空餘落落曉來星



許星臺廉訪六十壽聯

廉訪與夫人同庚其膝前子女及孫男女曾孫男女及外孫男女外曾孫男女其得七十人亦盛事也

聚兒孫內外得七十人登堂同拜生辰從古汾陽無此盛合夫婦倡隨成百廿歲轉瞬再周花甲如今史會是初筵

又

廉訪自言其夫人於十七歲舉長男後連舉二女又得一男又連舉二女自此一男二女相間而生

得男六人女十二人有如夫人者一人得男女各四人共得男十人女十六人因又譏此聯壽之

奇偶合陰陽算一男二女相間而生得十有八人每歲必添丁其餘蘭夢分占又弄四回璋瓦 富貴亦壽考從六旬初度遞推而上到百又廿載大年再周甲長此華堂聚順坐看七代雲仍

任竹賢刺史輓聯

刺史曾官江西樂平縣權景德鎮同知當粵賊之亂設立飛字營頗著戰功及從樂平移德化以其地多水患築長堤護之名曰永安堤并建石閘焉



居民卽爲立生祠於堤上後遷雲南鄧川州牧以
病不赴歸里數年而卒

以書生殺賊立功飛字營前父老至今談戰績 爲閩
閩築堤捍水永安聞上使君未死有崇祠

周霞城廣文輓聯

霞城名茂裕鎮海人余曾預修鎮海縣志君亦在
志局中故時通音問雖未謀面其意拳拳願在私
淑之列庚辰冬日猶寄余洋錢四十助刻石古仙
館筆記至辛巳元旦而卒亦可悲矣

汝川舊族望海名家惜此時邑乘已成未及爲君作佳

傳 鷄日占凶蛇年應識憶去歲郵筒遠寄尙煩助我
刻新書

繆仲英觀察七十壽聯

觀察以道光丁酉舉人官黔中至光緒辛巳年七
十矣其子小珊太史迎養入都因余與觀察有同
歲之誼乞此聯爲壽

開八豔至期願溯酉科名列賢書四十年前同詠霓裳
天上句 由一麾遷觀察喜子舍官居翰苑三千里外
笑扶鳩杖日邊來

譚文卿中丞六十壽聯



中丞始官日下屢上封事皆持大體及撫三秦活
飢民無算光緒五年移節浙中適有海外之警不
動聲色而備禦有法又修建文瀾閣購書度其
中以嘉惠學者余有壽序文言之甚詳中丞生日
余適在湖樓復獻此聯

內而調和官府外而存活閭閻妙在聲色不動中便有
如是經濟武則海上旌旗文則閣中緗素欲驗期願
無量壽請看何等精神

譚麗生編修輓聯

麗生名鑫振湖南衡山人光緒庚辰以第三人及

第至辛巳春來浙適余從湖上俞樓還吳下春在
堂已登舟矣麗生知之卽乘肩輿出武林門至余
舟中以後進禮見余未及往答則再見於吳中乃
甫踰一月而麗生遽以咯血而死聞其臨終神識
不亂以其九齡幼子所臨元秘塔碑交付其同年
徐花農庶常默寓託孤之意亦深可悲矣

如何探花使竟作報羅人最憐客死浙西難攜九歲孤
兒託付同年良友 回憶小舟中曾修同館禮猶冀重
逢吳下誰料武林一面句銷文字因緣

吳母張太夫人輓聯



太夫人爲子健中丞之生母年八十有二於辛巳
歲五月五日卒於江蘇撫署時
慈安端裕
康慶昭和莊敬皇太后遺誥頒行天下江蘇甫奉
到也

憶往歲鸞歌鳳舞獻壽寢門踰入秩甫二齡曾元五代
同祝期頤何今年佳節端陽頓撤蒲觴陳素俎 看令
子武達文通起家翰苑由屏藩到開府節鉞三吳親承
色笑痛此日普天縞素又扶桐杖哭慈闈

又爲潘季玉觀察作

中丞河南固始人曾爲湘藩鄂撫及撫蘇又再攝

兩江總督所至輒奉太夫人版輿以行故上聯云
然

鍾毓白雨河兩湖雨江同依福蔭 曾元羅五代五月

五日頓失慈雲

密通和尙輓聯

和尙揚州人草錫姑蘇有年矣城外虎邱寺城中
永定寺皆其所重建也於光緒辛巳歲示寂年六
十有一蓋與余同歲者

看君赤手興兩處三門此事山心精力果 媿我白頭
亦六旬一歲至今猶帶水拖泥

杭州金華將軍廟聯

金華將軍曹氏名杲仕後唐為金華令吳越時守
婺州錢氏入朝委以國事杲即城隅凌三漚曰湧
金既歿民為立祠池上其神每化為蛙游戲人間
光緒辛巳歲三月見于俞樓因題是聯

躡鄴侯六井繫金牛湖畔三池利澤縣延百世祀 傍
坡老古庵築碧霞亭前新舍神靈飄忽一來遊

黃觀臣太守輓聯

太守為怨借前輩之子需次江蘇與海運之役卒
於通州

潞水轉雲帆未及生還黃歇浦 長沙歸旅櫬不堪腸
斷白頭親

俞友聲大令輓聯

友聲名麟振紹興人以諸生從戎積功得知縣同
治丁卯歲舉於鄉光緒丁丑歲成進士仍以知縣
原班分發江蘇未幾以疾乞歸卒于杭州年五十
三余在吳下及湖上皆來相見執族子禮然服屬
固不可考矣

戎幕久參北府文闈仍捷南宮在吾宗不愧後來秀
吏才未試東吳噩耗俄傳西浙於古人甫及服官年



應母朱太夫人輓聯

朱太夫人爲應敏齋同年之母光緒辛巳年八十有八春閒卽臥病至六月十三日自言欲去已屬續矣乃歷三刻許復蘇至十五日呼敏齋至牀前傳以遺命又言欲去言已溘然舉家號呼則又言曰人生有何樂處汝曹喚我轉來甚無謂也自是又闕數日至二十二日而逝其來去之際若可自庄必是有夙根者敏齋妾張氏同日化去亦可異也

勉爲兒曹作十日留來去從容騰膝前小婦同行定有

三生緣分在 并算閨餘過九旬外富貴壽考想天上羣仙高會依然入坐起居榮

德清烏山社廟戲臺聯

烏山卽德清山余故居南埭在山之陽余卽社中人也社廟戲臺成父老屬題此聯

借絲竹傳山水清音里社歌謠新樂府 與父老語昇平盛事歲時伏臘古臨溪

杜筱舫方伯輓聯

筱舫六十歲時余曾以聯爲壽載在上卷已畧述其生平矣辛巳之秋筱舫卒於嘉禾里第因復以



此聯輓之余爲內子姚夫人之姪穀孫娶後舫從
兄女故有昏姻之語

入仕途到開藩陳臬游刃恢恢更觀采香小集平寇巨
編歎公戎幕起家又向詞壇高樹幟 論交誼兼朋友
昏姻前塵歷歷回憶傾蓋秣陵望衡吳市此後武林歸
棹爲誰秀水再停橈

嚴繙生庶常六十壽聯

繙生自人詞曹至今十有一科矣改官比部因太
夫人年高不赴今太夫人年逾八旬而繙生亦六
十矣八月三十日其生日也以一聯壽之

六旬人詞館逾十科長依堂上慈親學老萊子白髮綵
衣而舞 一樽酒清秋交九月好作山中宰相領韓魏
公黃花晚節之香

李少荃相國六十壽聯

相國於光緒壬午歲行年六十正月五日其生日
也

嶽降崧生溯道光三年到光緒八載 鸞歌鳳舞先上
元十日祝元老千秋

勒少仲河帥輓聯

少仲於道光丁酉歲充拔貢生甲辰舉於鄉皆與



余爲同年而又副癸卯賢書先兄福甯君亦於是
歲捷鄉闈則又所稱兄弟同年者也數十年來以
文字論交最爲莫逆君由刑曹起家歷官至江蘇
布政使遷福建巡撫調貴州巡撫未之任道拜河
東河道總督卽引疾歸閱數月遂不起憶去歲君
自閩赴黔道出蘇州寓居吳退樓聽楓山館時相
過從不意一別遂成千古因寄此聯輓之不禁衰
淚之橫集也

屈指數名場於丁酉於癸卯於甲辰居然三度叨分攀
桂天香積四十餘載文字交情如此同年能幾箇起

家由比部而蘇藩而福撫而河督歸自八閩小住聽楓
山館與六七故人從容談笑誰知一別竟千秋

李伯太夫人輓聯

太夫人乃小荃制府少荃相國之母也光緒八年
二月卒於兩湖節署 特降詔書有賢母之哀海
內榮之時海外又小有齟齬 朝廷方倚相國爲
重 優詔奪情而相國固辭未知能如所請否也
賢母之名定自朝廷降明詔褒揚榮在重重芝誥外
諸侯之孝異乎士庶贊廟謨撻伐謀成五五聖廬中

呂仙祠聯



蘇州閭門外有一公所衆商人醵資爲善舉者於
此會集焉中奉呂仙盛旭人觀察屬題此聯

小築仙居是當年寶劍藏精故地 廣爲善舉體先生
金丹濟世婆心

樊讓村太守輓聯

讓村爲余親家翁玉農太守之長子余大兒婦之
兄也雖以知府候補而實未一日居官優游家食
年五十六歲而卒其長子年二十矣未娶也

五十年知命又過六齡看弱冠佳兒將納婦 二千石
好官未曾一赴享半生清福竟成仙

張通甫大令輓聯

通甫以縣令官吳中今年與於海運之役四月旣
望卒於津門年六十矣其子振槩正攝天津縣事
饗饌六旬翁尙堪奉檄丁沽海舶千帆催轉粟 清和
四月節正聽鳴琴子舍津門一夕罷栽花

邵步梅刺史七十壽聯

壬午九月爲步梅七十生辰余爲文壽之已詳載
其行事矣是月其家適有事改於十月稱觴又贈
此聯

在家爲善士在官爲循吏到七秩古稀年繼起有賢子



子又生孫生曾孫行看五代同堂作熙朝人瑞 故鄉
諸戚友故交諸弟兄借十月小春日合詞而祝公公與
夫人如夫人俱享百齡土壽成平地神仙

願晉叔待詔輓聯

晉叔爲子山觀察子喜翰墨澹榮利亦一佳子弟
也去年曾繪自訟圖圖中三人一官一吏一訟者
實卽一人皆自貌其容也余爲載入春在堂隨筆
今年秋以微疾卒年五十矣

借自訟意以成圖化一我幻影成三知達者久存南郭
忘形見 到知命年而出世歎老父衰齡望八與走也

同作西河抱痛人

陸星農觀察輓聯

星農以第一人及第余庚戌同年也自湖南謝病
歸所藏古博甚富今年在西湖俞樓猶與相見不
謂越兩月遽聞其訃也

四五月閒訪我樓頭茗椀清談到金石 三十年前附
君榜尾蓬山舊夢落江湖

王母俞太恭人輓聯

太恭入爲王孝子繼穀之母孝子因母病爲蔬禱
於神請以身代遂自投月湖以死死後相傳爲月



湖之神太恭人病愈又數年而卒卒之日八月廿四也

爲孝子一疏塵世小留此事不由南斗注 後中秋九日月河就養至今仍是北堂身

嚴母王太夫人輓聯

太夫人曾從夫宦游滇中著有寫韻樓詩一卷晚年捐貲助賑 賜建樂善好施坊卒年八十四

行萬里路傳一卷詩寫韻樓小集編排共羨清才兼碩德 膺二品封開九秩壽樂善坊大書綽楔長教薄俗式高風

又

太夫人之父竹嶼先生仕浙江有惠政歿祀嘉興名宦祠夫比玉先生祀鄉賢祠其少子某官貴州右阡府知府死寇難 賜卹如例其幼女割臂肉療太夫人疾太夫人愈而女竟卒以孝女 旌亦可謂極人倫之盛矣張少渠屬代撰輓聯因又作此

父在名宦祠夫在鄉賢祠子在昭忠祠女在節孝祠相見黃泉死猶生也 德可先賢傳行可逸民傳才可文苑傳年可耆舊傳有光青史女而士乎



錢敏肅公專祠聯

公諱鼎銘當江蘇淪陷時公聞闕赴皖謁曾文正公慷慨乞師遂以楚師至江南底定公之力也後官河南巡撫有善政卒於官 敕於原籍太倉州建專祠祠成其嗣君溯耆溯時乞撰此聯

溯當年千里乞師一舟摩寇壘而過抵掌高談論列山川形勢與夫賊情變幻及東南進取之方聲共淚俱此事中興關大局 迨後來兩河開府四載在夷門坐鎮悉心綜理講求治術源流旁及邊境安危并水旱偏災之備人亡政在於今故里有崇祠

錢湘吟侍郎輓聯

侍郎乃庚戌同年也嘉善人

數杭嘉湖同鄉同館同年白首江湖惟我在 歷咸同光三朝三十三載黃梁光景不多時

邵泮生侍郎輓聯

湘吟卒之明年泮生又卒余與泮生甲辰庚戌兩次同年卽用輓湘吟聯增益其詞蓋情事旣同詞亦不嫌複也

算鄉會試兩榜兩度作同年並列賢書俱成進士偕入翰林白首江湖惟我在 溯咸豐來三朝三十有四載



起家詞館歷任封疆珥登卿貳黃梁光景不多時

陶大母凌太淑人輓聯

太淑人爲柳門刺史之祖母年十六歸於陶未逾
年而寡其卒也年八十九矣是年四月閒已病柳
門自吳下歸省之笑曰吾猶未也當在端午前三
日耳後竟於五月三日卒亦可異也

黃鵠壽偏高回頭七十二年苦節終身如旦暮 青鸞
來有信屈指五月三日歸期一笑語孫曾

惲小山太守輓聯

太守爲惲次山中丞之子曾與大兒紹萊同官

蓄澤在甘棠喜君紹南服官聲異他時閱歷老成三楚
建旄仍虎節 重泉埋玉樹令我觸西河餘痛憶曩日
聯翩年少一官聽鼓共豚兒

許壽民太守輓聯

太守爲許星憲廉訪之子南海世家也其生也高
祖母黃太夫人猶在五世同堂而黃太夫人及事
祖舅姑親見七代蒙 恩賜七葉衍祥額太守應
京兆試舉孝廉官郎署今以知府需次江西故廉
訪宦游舊地也乃未及補官而卒年甫四十八惜
哉



甲第重羊城在襁褓名達九重天記生初七葉衍祥曾
荷恩榮來北闕 丁年捷燕市歷兵農出爲二千石惜
中壽五旬未滿不能宦蹟繼西江

王曉蓮方伯輓聯

方伯爲先兄癸卯同年官至湖北布政使以理學

自命者也

溯咸同間投筆而與人謂名臣自云儒者 問癸卯科

同年有幾旣傷老友更念先兄

姚室張夫人輓聯

夫人爲訪梅方伯之配生平樂善好施其靈輒自

天津返有瞽者數十人泣送蓋皆受其惠者也余
爲作家傳存稞文中

好施從天性而生積數十年陰德耳鳴記曾丙舍勒銘
雖拙筆不工言是實 遺澤在人心未死合千百家窮
檐頂禮看取丁沾歸旆縱盲兒無目淚難乾

孟河蔣氏支祠聯

常州孟河馬培之文植以醫名光緒六年

慈禧皇太后有疾 詔徵天下精醫術者馬君亦

與焉比歸 命南書房翰林書務存精要四字

賜之遇亦榮矣然君實姓蔣氏在漢世有封山亭



侯者其始祖也明季有自鳳陽遷金陵者婚於馬氏馬故世醫也至是無後以蔣氏承其業遂襲其姓然醫則馬氏婚宦則皆蔣氏也支祠落成求余爲記又乞是聯

淵源溯漢代侯封縱盛名馬服交推蔣徑清風傳白遠
祠宇法文公家禮況宸翰龍章寵錫孟河喬木仰彌

高

鍾桂溪廣文七十壽聯

桂溪與余皆於道光丙申年入德清縣學至今五十年矣

溯五十年泮水同游爲問幾人合健在 祝八百歲大椿不老休言七秩古來稀

賀許星臺方伯之孫新婚聯

時方伯方由蘇臬遷浙藩期於明春赴浙

嘉耦百年成試新畫眉剛好梅開東閣 阿翁一笑起攜小比肩去看花放西湖

徐室楊夫人輓聯

夫人爲同年徐蔭軒尙書元配有子五人孫四人曾孫一人且曾四次拜緞匹之 賜歲六十五而卒亦福壽兼備者矣



壽近七旬封膺一品試檢取笥中文綺從九重幾度頒
來豈止崇班冠興慶子榮五桂孫倍雙珠更攜將膝
下錦綳合四代同堂聚處差堪哀思慰安仁

戴保卿通守輓聯

保卿爲醇士侍郎之子官松江府通判其子青來
太史余門下士也

以名父子見宰官身佐郡在雲閒白首浮沈今老矣
有繼起英繩乃祖武奔喪從日下素車風雪太淒其
胡樛園明經輓聯

樛園乃余從前館新安汪氏時曾受業門下者也

往日列門牆最憐年少美才常指青雲期遠到朔風
吹噩耗頓觸老夫舊感重回白首憶前游

王母李太夫人輓聯

太夫人爲王竹侯方伯繼母

膺一品封屆九旬壽羅四代兒孫瑤島應推衆仙長
生嘉慶初終光緒閒受道咸誥命華堂坐閱五朝春

靈瀾精舍聯

蘇州橫山智顯禪院有醴醴和尚以錫杖叩石得
泉見吳郡圖經續記虎邱山下有泉曰愍愍或曰
亦醴醴和尚遺跡橫山與虎邱相近愍與醴音又



相同疑或然也甲申歲洪文卿閣學朱修庭觀察
訪得是泉築精舍於其上鄭小坡孝廉命曰靈瀾
余爲題榜并題是聯其地卽在眞娘墓畔故下聯
及之

一勺試清泉此邦故老流傳都道是醜師卓錫峯頭遺
跡數椽營勝地我輩閒人游覽勿徒向眞娘埋香冢
畔題詩

周叔雲都轉輓聯

都轉爲余鄉會兩榜同年罷官後來居吳下未半
載而卒

甲歲發科庚年登第兩番倖附驥旄閱歷名場皆白首
都門判袂吳市班荆幾日同磨麈尾重提舊夢竟黃
梁

樊穉農比部輓聯

穉農以孝廉官比部頗有才幹因奉母不之官年
未五十而卒其上有四兄一姊不數年相繼逝世
亦可悲也

興廉舉孝有幹濟之才郎署方期儲大用 兄亡姊逝
又慘遭此變親庭何以慰慈懷

薛慰農觀察輓聯

慰農曾以杭州太守權糧儲道解組後主崇文書院講席與余所主詒經精舍遙相望也旋移席金陵尊經書院以去其在金陵日以詩酒自娛頗極林下之樂云

溯西泠講席相聯十里湖山兩壇坫 看南國甘棠猶在千秋循吏一詩人

東洲船山書院聯

東洲在衡州府東書院乃彭雪琴尙書所創建曰船山者以王船山先生名也

讀船山先生所著全編得三百餘卷之多經史子集蔚

一代巨觀承其後者勿徒爭門戶異同漢詳名物宋主義理各有師傳總不外古大儒根柢實學 卜衡嶽勝地而開講舍看七十二峯在望春夏秋冬備四時佳景登斯堂也尙共矢晨昏電敏出建功勲處修節操交相砥礪以毋負老尙書創建初心

宗懋亭封翁輓聯

封翁爲湘文太守之父湘文仕吾浙守衢守湖守嚴守嘉興甯波所至有聲翁嘗訓之曰汝曹居官能去民疾苦是卽所以養志也今歲翁年八十有三矣一日晨興誦金剛經畢忽感微疾越六日命



家人易衣云將有遠行俄而遽逝

有令子仕二千石勤恤民隱振起人文先生顧而樂之
笑曰汝能養志 享大年逾八十歲服習儒書精通笈
典一旦飄然逝矣自云吾有遠行

日本銚吉君六十壽聯

日本東京人井上陳子德來游中土受業吾門今
年其父銚吉君行年六十母下山氏五十有五寄
此聯壽之

有令子萬里來游言家庭期望深心外則賢父內則賢
母 祝而翁百年偕老看郎君講求實學處爲名士出

爲名臣

吳叔和郎中輓聯

叔和爲曉帆觀察之孫嘗隸余門下今年春余在
俞樓叔和猶載酒過我作竟日談然其時已病矣
既而來蘇就醫病重而歸以解維稍晚雖以小輪
船曳之行然至杭州已次日亥時矣不及入城至
子時卒於舟中惟其妻在側一子甫二歲一庶子
七歲均不在舟亦可慘矣

滯吳中半日歸程歎到家尙隔重城黃口孤兒未及提
攜拜牀下 憶湖上早春雅集痛及門又弱一个白頭



老友空餘涕淚灑風前

任秋亭大令輓聯

秋亭精於醫筮仕江蘇曾攝金山令余從前建春
在堂營曲園所用匠石卽其所薦也

良吏卽良醫看君花縣撫循仍爲閭閻蘇疾苦 實心
行實事記我草堂卜築曾煩土木助經營

李眉生廉訪輓聯

廉訪官蘇臬使未任而以病免卽卜居吳下買輞
師園居之其地在滄浪亭東故自稱蘇東鄰余寓
吳下頻與往來廉訪之封翁乃 先大夫丙子同

年也其卒於光緒十一年八月之望

蘇公千載後十萬買鄰以舊使君吳下句留定有前生
緣分在 桂子一輪秋三五而闕歎先大夫年家昆弟
不知當代幾人存

薛心農離尹輓聯

心農以離尹需次浙江精於醫往歲

慈安皇太后不豫徵天下名醫浙撫以心農應 詔亦
奇遇也其子受采官知縣

西湖宦蹟與蘇白俱留繼起清芬欣有子 北闕徵車
以岐黃應詔他年方技定傳君



姚少讀太守七十壽聯

少讀行年七十權守松江十月初旬其生日也而
官牒則云年六十五適與余同歲矣

二千石坐領古三江問生辰在十月之初嶺上春爲公
獨占 七十翁行開第八秩稽仕版則六旬有五壺中
日與我同庚

吳仲英司馬六十壽聯

仲英以杭人官吳下吏治之外兼擅風雅非俗吏
也行年六十書此壽之

王摩詰宿世詞客前生畫師儒雅風流又官二千石

白香山杭州酒痕吳郡詩本往來遊戲已及六十年

彭雪琴尙書七十壽聯

尙書督師廣東者三年今始罷兵而歸行年七十
矣十二月中旬其生日也先一月爲其長孫娶婦
因憶余六十歲時爲孫兒陞雲娶婦卽君之長孫
女也君以一聯見贈上聯祝詞下聯賀詞也今按
其例亦贈一聯

桂海正銷兵七袞開筵會有恩綸來錫壽 蘭孫新授
室一堂舞綵好攜嘉耦共承歡

朱母趙太夫人七十壽聯



卽上卷所載六十壽聯之朱母趙太淑人也今行
年七十正月二十四日爲其生日其子竹石司馬
已遷觀察使且權蘇臬矣

以歲之正以月之令鞠臚一尊爲阿母奉觴而上壽
八十曰耆九十曰耄期頤百歲看佳兒陳臬又開藩

潘玉泉觀察輓聯

觀察乃文恭公季子同治之初收復江蘇與有力
焉詳見余所撰壽序已刻入禰文續編第五卷矣
光緒十一年十二月二十八日病卒越三日於除
夕大歛卽其生日也

溯中興初功在三吳皖江乞援滬濱聯防最難口舌折
衝坐看反側異謀潛消談笑際 享古稀壽榮封一品
夫婦齊眉兒孫繞膝方謂期頤操券何意縣弧穀旦卽
是蓋棺辰

沈蓉閣方伯輓聯

蓉閣乃響泉同年之子由進士起家官至廣東布
政使中壽而卒未竟其用可惜也

以名進士振起家聲堂構相承深喜故人能有子 由
賢令尹璠登方岳節旄未逮竊爲聖代惜斯才
樊母余太夫人輓聯



太夫人爲樊玉農親家之配生六子皆前卒有孫
八人曾孫三人於光緒十一年八月十七日卒年
七十有七至十二月吳中始得赴告其次女爲余
大兒婦方有疾故未使聞知也

榮封二品上壽七旬繼起喜有諸孫玉樹依然滿階下
噩耗三冬仙遊八月遠嫁最憐弱女麻衣未得拜牀

前

暉母戴夫人六十壽聯

夫人爲次山中丞之配俠骨清才非尋常羅綺中
人也五月十三日爲其生日

歷道咸來四朝重重芝誥疊膺一品花封其人擅淵雲
詞藻具湖海襟懷信有須眉在巾幗 過端陽後八日
瀼瀼蒲觴留祝六旬萱壽從此羅五代曾元躋百齡耄
臺豈非富貴又神仙

吳引之觀察挽聯

觀察於咸豐閉兩守衢州力保危城浙東西十一
郡惟嚮獨完君之功也其先德爲先大夫丙子同
年

兩代訂茲韋閭先君丙子世交喬木故家能有幾 三
衢資保障歎吾浙庚辛浩劫疾風勁草孰如公



梁敬叔觀察輓聯

觀察爲菑林中丞之子中丞乃先祖甲寅同年也
而觀察又與余爲丁酉同年官浙江數十年始爲
溫州太守後官甯紹台道又歷署金衢嚴道溫處
道杭嘉湖道浙東西宦跡徧矣

以名父子銓歷二品階官太守循聲卓卓官觀察政聲
尤卓卓 歎老成人又看一个弱論丁酉年誼寥寥論
甲寅世誼更寥寥

吳子健中丞輓聯

中丞爲諸生時卽從事軍旅後以翰林院侍讀學

士出藩三楚旋授節鉞光緒十二年五月十三日
歿於皖江節署年六十四

以書生歷戎馬由詞苑陟封疆闕下嚴徐軍中韓范
周花甲甫四齡過端午剛八日民懷遺愛帝念前勞
鈕竹君大令輓聯

竹君爲先兄癸卯同年官甘肅知縣

歎先兄鄉薦同年攀桂故人又一個弱矣 問使君甘
涼出宰栽花何處有三徑資無

畢孫帆內翰七十壽聯

內翰以八月十六日生其內子馮氏同歲



七十古人稀況偕老百年有嘉耦共扶鳩杖坐 三五
明月滿加良宵一夕爲先生添取鶴籌來

劉母曹太夫人八十壽聯

太夫人爲劉作仙大令之母守節五十二年有三
子四孫兩曾孫十月二十七日其生日也

台一堂三子四孫又有兩曾孫綵服爛斑同祝百齡上
壽 守大節五十二年今屆八旬年慈容矍鑠欣逢十
月陽春

彭南屏太守輓聯

南屏曾官廣東知府家居數載沈仲復閣學疏言

其才可用有 旨引見入京三日而卒其父訥

生太守猶在堂也

五羊城內五馬官高治蹟久登黃霸傳 雙鳳闕前雙

魚信斷傷心莫慰白頭親

王小鐵同年輓聯

小鐵爲余甲辰同年年七十有二老而矍鑠一病
遽卒余往弔之見其一子一女子年十五女僅數

齡也

追溯四十年前共詠霓裳歎故交又少一人同榜同
年竟無幾 正羨七秩二齡翁健扶鳩杖詎小病不消



半月幼兒幼女劇堪憐

索爾和碧漢母那拉夫人七十壽聯

夫人爲文農太守魁元之母太守曾守鎮江欲爲
夫人壽而夫人因適有水災輟稱觴之費爲續命
之資是邦之民至今感之今歲年七十矣十二月
十日其生日也太守方守蘇州於十月十日預祝
是日乃

慈禧皇太后聖壽節也余在右台仙館率書一聯爲夫
人壽

借小春預祝千春恭遇普天開壽宇 在京口歡騰萬

日又聞頌德滿蘇臺

季君梅太史輓聯

太史爲仙九先生子庚戌翰林甫留館卽乞養歸
遂不復出主講江陰書院有三子其長公官兩浙
鹽運分司次公官長蘆鹽運使

尚書門第翰苑聲華羨青山綠水偃仰半生幾年朝服
頻年野服 馬帳風淒鯉庭霜冷歎苴杖麻鞋倉黃兩
地之字江邊丁字沽邊

葉春伯觀察輓聯

觀察以進士作命廣西官至候補道引疾歸寓紹



興年七十有一而卒距王小鐵觀察之卒不及半
年皆余甲辰同年也

桂林遺愛叢山寓賢看齒杖優游七秩已開第八秩
翻水秋寒石林冬隕歎牙琴零落半年頓失兩同年

李肅毅伯夫人趙夫人五十壽聯

夫人於二月十九日生是年爲光緒十三年恭逢
皇上於正月十五日親理萬機肅毅伯以首輔督直隸
駐天津敬以此聯壽之

新政出九重黃閣餘閒喜逢家慶日 春光纔一半綺
筵介壽巧值佛生辰

周母姚表姊恭人八十壽聯

恭人爲平泉舅氏長女於余爲外姊於亡婦則兄
弟也今年八十矣於五月一日生而於四月九日
豫行稱觴之禮余往祝之白髮青裙縱談往事因
憶余兒時 太夫人每邀姊來度歲所居史家埭
有樓臨街元夜張鐙與姊登樓觀之情景猶如昨
日而余與姊皆老矣

借清和四月祝曼衍千齡喜看令子賢孫奉阿母豫慶
華堂午節 越在再十年便期頤百歲猶憶垂髫總角
與吾姊同看史埭春鐙



吳牧騶觀察輓聯

觀察與余並以道光丙申年科試入學庚子舉於鄉壬子成進士由庶常改官雲南所著有小匏庵

詩集詩話

憶柔兆涖灘歲泮水同游先我一科舉孝廉遲我一科成進士 出承明著作庭滇池遠宦讓君千古在政事附君千古或文章

朱鏡香明府輓聯

鏡香官寶應縣令罷歸後屢主書院講席道光丁酉科拔貢生也余於是科亦廁名副榜後又於甲

辰科同舉於鄉

明經科孝廉科兩度作同年共踏名場如昨日 循吏傳文苑傳千秋無異議長教里社祀先生

吳煥卿大令輓聯

煥卿與余同歲而煥卿以正月生余以十二月生蓋長於余也余館休甯汪氏時來受業於門下後成進士官浙江蘭溪知縣未滿兩考改教授而去有王晉平恐富求歸之意余嘗語浙撫李小荃制府曰此君作令必佳余見其文筆甚清卜其作令亦了了也後果如余言



是吾所兄辱稱大弟子桃花潭畔以都講相推迄今舊
夢重提泡影電光卅年事 由名進士出見宰官身蘭
菑溪邊有神君之譽記我片言論定文章吏治一般清

浙江會館聯

館在天津府城中因舊時浙紹鄉祠舊地爲之

從之字江邊到了字沾邊三千里遠來同歸安宅 拓

越中舊館爲浙中新館十一郡咸集各語鄉山

任母王太夫人輓聯

太夫人爲筱沅中丞之母中丞父諱烜爲先祖南
莊府君同年太夫人年八十九而終有元孫矣

從令子到元孫五代同堂堂上尊榮古賢母中罕見此
母 溯吾祖副鄉榜九十四年年家故舊太夫人外更
有何人

金茗人觀察六十壽聯

觀察以江蘇縣令起家當克復蘇州時設法遣散
降賊甚衆後山東直隸水災集巨貲振之今以按
察使銜直隸候補道辦理河工

耆壽六十齡起家花縣晉秩柏臺玉節行除觀察使
存活億萬衆解散黃巾安全赤子金隄更築使民渠

翁仲淵修撰輓聯



修撰乃文端公孫文勤公子 恩賜舉人進士應
殿試魁天下然以疾早歸官止修撰

三秋桂三春杏皆從天上頒來只獨占金鼇頂上 文
端孫文勤子何意山中歸卧竟長辭綠野堂前

姚母  太夫人輓聯

太夫人以夫笛秋比部子訪梅觀察孫伯庸觀察
加級請封皆封一品年八十七而終生平食無兼
味衣必手浣可謂難矣

以勤論過人百倍以儉論過人百倍以福論亦過人百
倍八十七齡真壽母 因夫貴受封一品因子貴受封

一品因孫貴又受封一品九重三錫太夫人

莫意樓觀察輓聯

意樓以九月十日生九月四日卒曾宰嘉定其子
璵香明府亦以知縣官江蘇

治譜在三吳父爲循吏子爲循吏 清風宜九月生近
重陽歿 近重陽

朱孝子祠聯

孝子名高字兆光香山人母病癯與妻陳以竹倚
昇之周行家衡又因母嗜飴逢市集每躬往市之
市者曰吾鸞此三十年但見人市以啖兒女未聞



以奉母也一市嗟歎

有愛子市館無愛親市館小節尋常萬口咨嗟稱大孝
兒爲母昇輿婦爲姑昇輿高年安樂八騶傳唱總浮

榮

廖仲山少司馬五十壽聯

仲山以兵部侍郎充總理各國大臣六月中生日
盛夏祝長春半百剛符大衍數 本兵兼典屬九重深
倚老成人

何青士都轉八十壽聯

都轉舊官浙江杭嘉湖道晚年仍寓杭州何文

公之子也

舊日賢使君今日寓公六橋三竺大有緣在 早年名
父子晚年耆宿蒼顏白髮不亦仙乎

張杞堂廉訪輓聯

廉訪曾官十府糧道遷蘇臬今年大府奏請赴江
北開濬河道甫回任值亢旱偕同官求雨感暴疾
不一日卒

轉漕輸於江北陳臬事於吳中簡在帝心期建節 憂
洪水而治河憫亢陽而求雨勤勞民事竟捐軀

陳母徐太淑人輓聯



太淑人爲杭州太守陳仲英之母在室事繼母出嫁事繼姑所處皆甚難而能曲盡女婦之職夫亡撫子女成立今歲甫得曾孫乃感微疾於九月十三日卒

事繼母繼姑曲得歡心自從夫子云亡辛苦支持歷三十三年五夜青燈常飲泣教孤子孤女蔚成鼎族甫幸曾孫在抱團樂歡宴過九月九日七旬黃髮遽歸眞陳仲泉觀察輓聯

觀察爲余甲辰同年以病乞歸久矣今年重來吳下主於其女壻家八月十六日余往視之已偏廢

不能行動然其神明不衰論各省秋闈題良久乃別未及十日竟卒其自營生壻卽在右台山與余墓門相望也

憶中秋後一日白首重逢相與揮塵論文片刻清談猶娓娓 溯卅載前同年黃梁大夢尙幸眠牛接壤異時宰樹共蕭蕭

蔡室朱夫人輓聯

夫人乃老友朱璞山司馬之女公子余爲平章歸蔡仲然司馬爲繼室今秋以微疾卒

小疾竟難瘳夫壻重占炊臼夢 老懷殊有感蹇修曾



作執柯人

暴梅村大令輓聯

梅村爲余甲辰庚戌鄉會榜同年以知縣仕江西
老而告歸主書院講席者十許年年八十一而終
其子舉孝廉登拔萃科者數人孫式昭以江蘇平
望司巡檢爲諱序初中丞所深賞列之薦刻有
旨交軍機處存記亦異數也

居官在循吏傳中居鄉在耆英會上壽逾八十考終溯
嘉道咸同遠歷五朝齒德達尊從古重 有子則天府
聯登有孫則御屏特記坐看一門鼎盛數甲辰庚戌同

年兩榜身名俱泰似君稀

曾劼剛侍郎五十壽聯

劼剛爲曾文正師長子襲一等毅勇侯歷使外國
今以侍郎充幫辦海軍大臣

漢班超以通侯立功萬里外 晉郤縠爲元帥行年五
十時

惲叔來廣文輓聯

叔來爲惲次山同年之子其兩兄皆前卒叔來內
行甚篤兼有幹才其繼母戴夫人自幼撫之哭甚
勸叔來之未卒也有爲之召仙者箕筆判曰巳巳



已今年歲在己丑其卒於四月十四日月建己巳
日亦己丑是可異矣

伯氏云亡仲氏云亡歎堂前衰淚未乾那堪第三度更
傷愛子 年榦在己月榦在己想天上除書早定巧逢
十四日又屆先庚

楊濱石太常輓聯

濱石以壬子一甲第二人入詞館直 南齋屢拜
御書 御製之 賜歷充湖南福建山東考官亦
極儒臣之榮遇矣以太常寺少卿乞病南旋主書
院講席者垂二十年年六十七歲而卒

擢上第以登朝十八學士供奉禁廷六一先生主持文
柄 捧賜書而旋里謝傅東山尙存遠志鄭公北海頓
失經師

葉槐生貢士輓聯

槐生以庚辰年會試中式貢士遽以奉諱歸未及
殿試至今十年矣今年庚辰一科得試差者七人
而槐生猶未登甲第也主講滬上敬業書院亦游
余門下曾爲余注賓萌外集未成

看幾人旌節軒憐君黃榜虛登博十年進士空名未
與編排金殿試 了一生泉比講席勞我自頭遠望撫



四卷賓萌外集更誰箋注玉溪文

長女壻王康侯輓聯

康侯爲余同年文勤公之子文勤以福建巡撫薨於位 朝廷賞延後嗣長子 賜舉人三子 賜主事而康侯以次子拜員外郎之 賜自幼能文 餼於庠鄉試屢薦不售庚午科已擬中矣以文逾 八百見擯鬱鬱遂成心疾今年九月以他疾卒有 子二人長子念曾己兩應鄉試矣頗望其能成父 志也溯自丙寅春入贅於寒門至今二十四年耳 余衰年又慘遇斯事老淚不勝揮矣

甥館記相依廿四年遽斷塵緣最憐虛被天恩了此生
白蠟明經空有頭銜挂郎署 名場嗟久困八百字誤
逾功令自此遂成心疾問何日青雲得路好將科第付
兒曹

孫省齋方伯輓聯

方伯爲道光丁酉拔貢生甲辰舉人余皆與爲同
年生由翰林御史出任監司官至直隸布政使引
疾歸寓居揚州十餘年而卒

由東觀西臺出膺方面翺翔皇路馴至陳臬開藩又林
泉十載閒居大好綠楊城郭裏 憶丁酉甲辰共踏名



錫寥落晨星存此同年前輩歎雲水一江遠隔從今白髮故人稀

鍾桂溪廣文輓聯

桂溪為余同縣人與余同入縣學者也年七十有四而卒時為其孫娶婦甫逾月也

備九五福考終膝下嬌孫剛好迎將新婦至 話六十年舊夢邑中老輩更誰共作泮宮遊

潘伯寅尚書六十壽聯

伯寅時官大司空

東坡行年六十作小乘定 西漢置公一人曰大司空

附錄跋語東坡有與程正甫書云曉夕默作小

乘定雖非至道亦且休息 國朝王文誥作蘇

集總案定是年為紹聖二年東坡年六十

大司空公一人見後漢書續志然大司空之設

實始西京其時固以大司徒大司馬大司空為

三公也尋繹班志自見

馮吉雲觀察輓聯

吉雲生於九月歿亦於九月其父尹平刺史以事

戍伊犁而卒其兄即竹儒觀察也

孝友備一生遺恨長留榆塞外 去來皆九月清風剛

稱菊花天

錢鳴伯駕部續娶聯

鳴伯兩娶皆徐氏女姊妹也

誦南國風詩君子得淑女為配 仿東坡故事同安繼

崇德來歸

顧子山觀察輓聯

觀察以進士起家官至甯紹台道年七十九而卒

卒之明年重遊泮水又明年重宴鹿鳴均不及待

也生平長於填詞分為八集第一集曰靈巖樵唱

第八集曰跨鶴吹笙譜所謂跨鶴吹笙譜者止望

江南一調首句皆以怡園好發端怡園乃君園名也

待明年泮水重遊及後年鹿鳴再賦吳中耆宿已成魯

國靈光何期耄耋將交遽報仙龕成海外 讀初集靈

巖樵唱到八集鴻背吹笙老去襟懷都付蘇家鐵板大

息園林正好空留絕調望江南





中国国家图书馆

NATIONAL LIBRARY OF CHINA